



partii naleraq

Nuuk 24. oktober 2018
UKA2018/193,
Pele Broberg Partii Naleraq

Uunga siunnersuut: Kommunit suliffeqarfinnik pigisaasa sanaartukkanillu pigisaasa ilaasa pisiarinerinut, qularnaveeqqusernerinut attartornerannulluunniit akuersisarneq pillugu Inatsisartut inatsisaat nr. xx, xx. xxx 2018-imeersoq.
(Aningaasaqarnermut Nunanilu Avannarlerni suleqatigiinnermut Naalakkersuisoq)

Siullermeenera

Inatsisissamut siunnersuut naqqitaq Partii Naleqqamit ima oqaasertalerusupparput.

Maluginiannngitsuunnngilarput inatsisissamut siunnersuut saqqummiunneqaqqaarneraniilli manna naqqiummut allannorsimanera.

Inatsisissap oqaasertaannaaniunngitsoq, aammattaarli siunertaanik.

Partii Naleqqamiit taakkartuinikuuvugut malitassat aaqqittariaqarnerannik, aammali paasisutissat nutaat malitsigisaannik isummersornerit allannortinnissaannut.

Inatsisissami siunnersuummi siunertaanikuuvoq kommunit pigisaat imaluunniit piginneqataaffigisaat, patajaattumik aningaasatigut aqunneqarnissaannut sinaakkusiinissaq. Inuiaqatigiit akiligassatigut artukkinnginnissaat anguniarlugu.

Maannali sinaakkusiineq kommunit namminneq pilersinnikuusaat aammalu inuttalersornikuusaat, kommunit namminneq isummersorfigisussanngorpaat. Kinguneqartitsisoqarsinnaananilu ajutoortoqassagalarpat.

Sooq taava sinaakkusiisuusaarniarpuq?

Namminersortut Oqartussat nalinnaasumik malitassat aammagooq kommunit pigisaanni aktieselskabiliaanni malinneqassapput.

Aningaasanik attartuinermi atuisut artukkernagit pisussaattillugit. Namminersortulli Oqartussat namminneq tamanna malingilaat. Kalaallit Airports A/S qiviaannartigu. Mittarfiit nutaat pingasut pilersinniarpaat, atuisunut akiligassanngornagu kisianni landskarsip minnerpaamik 2.100mio erniaaqanngitsunik akilersugassaannngitsunik aningaasaliisussanngorlugu.

Sooq taava kommunit piumaffigissavagut allatut? Immitsinnik piumaffigisinnaanngikkuttaluunniit akissaqartitsinnik, atuisut akilersorsinnaasaannik, taava qanoq allat piumaffigisinnaavagut?

Partii Naleqqamit una siunnersuut itigartipparput, oqaasertalerusullugu Naalakkersuisut piareerpata pisortat pigisaat imaluunniit piginneqataaffigisaat tamanut atuuttussamik saqqummiussisinnaanngorpata aatsaat qaqinnissaa innersuullugu.